

袁伯修著



國學珍本叢書

白蘇齋類集

上海國學研究社出版

白蘇齋類集

卷之一

古詩類

過黃河

飛蓋霽色新。爽氣來青嶂。行行見洪河。洪河流湯湯。津吏向我言。夜雨添新漲。一葉凌浩渺。沸波濺其上。鼓棹度中流。東西迷所向。露車爭碎鉤。雪屋互排盪。兒女色如土。老夫神猶王。自矢管公誠。豈憂蔡姬蕩。篙師若有神。布帆遂無恙。三老顧何能。呵護賴神貺。腐儒一寸心。幸哉天吳諒。刺刺撫兒女。無庸太惆悵。宦海多風濤。絕勝洪河浪。

訪陳晦伯先生晦伯留飲齋中有述

生平嚮大雅。遂得窺外屏。青嶂排傑閣。綠竹淨西軒。烏几羅萬軸。鳥跡辨三墳。婉孌蠡管測。睹此搖心魂。胸目宛委洞。旋面海若門。續讌日云夕。篝燈還細論。兕觥湛綠醕。麈尾發玄言。把臂須臾間。鄙懷難具陳。

題瘦馬卷

此馬從來號驂駟。漢庭九逸應難擬。躩蹠朝隨廣莫風。連翻夜度虞淵水。一自長鳴起渥洼。雙瞳如鏡氣如霞。陌上驕嘶逢紫燕。溪頭弄影見桃花。越境過都真可羨。縱橫滅沒淩飛電。時去黃金燕市空。瘦來白練吳門短。幾年躑躅老風塵。一朝膂力盡驚騰。土蝕驄花生黯澹。霜欺病骨太稜層。十年棄置向沙場。伏櫪壯心殊未央。垂頭却憶長嘶道。咄哉胡不遇孫陽。他時解轡逢知己。雕鞍玉勒黃金珥。努力猶堪馳萬里。九衢四野任君使。

公安袁宗道著

弟宏道參校

送吳尚之太史謁告歸桐城

與君三載游燕市。方內共結烟霞侶。清夜焚香禮法王。臨風揮塵談玄理。君今拂衣歸皖城。伊人遙在江水濱。一片素心向誰吐。三車疑義更誰論。萬事無如歸去好。有足何妨蹈三島。看君匹馬度春明。使我心飛邯鄲道。

題柏溪沈先生墨竹

柏溪先生二室英。手扶雲漢披瑤瓊。床頭百斗自浮湛。胸中五車闔縱橫。興來和墨掃生絹。幅幅宛出淇園清。古色莽蒼風雨黯。元氣淋漓鬼神驚。珍重一竿世稀有。已覺渭川無千畝。瑟瑟霜葉動秋濤。冥冥煙幹蟠蒼虬。瞥睹寒氣生兩腋。白雲冉冉墮虛牖。遙想盤礴落筆時。瀟湘失色神龍走。吁嗟沈翁直節似此君。脩脩得意兼得神。湖州太常非其倫。

題司選君寒玉軒卷

噫嘻江陵豈無千樹橘。千畦韭。何不植此比素封。那用萬竿修篁繞前後。君言長物無所愛。生平愛與此君友。縈沙帶水通三徑。斷雨咍煙開數畝。結實紛紛綸啄鳳。鳳老幹交加篆蚪蚪。秋靜寒濤生白日。夜永涼颼散虛牖。綠戶瞳朧月自過。紅塵却掃雲爲帚。主人高節干雲霄。寒玉青青可與偶。只今文昌懸藻鏡。共羨清白勝瓊玖。不見江上草堂葱菁間。圖書之外復何有。此中應許二仲過。倘容袁粲相從否。

白燕篇爲元馭閑老賦

我聞玄鳥產勾曲。數千年來化爲白。素質本孕瑤光星。玉姿豈比零陵石。雲波日影泛參差。酒泉事遠見應稀。不向烏衣國裏來。偏宜白玉堂中棲。荆花爛爛蔭修廡。藜火娟娟映雙羽。輕沾弱絮迎柳風。閑趁粉蝶度花雨。柳風花雨春未央。雕梁網戶任飛翔。影寫瑤池寧異色。泥啣珠箔但聞香。人間粉黛誰堪匹。雅黃翡翠無顏色。簾前拂羽詎相見。幕中巧語暫相識。朝朝翻玉砌。暮暮度水涯。暮度渾如侵月色。朝翻疑是帶霜華。霜華月色相凌。

亂遊絲冉冉迷歸翰。豈逐流鶯媚綺羅。宜隨野鶴凌霄漢。君不見。啁啾叢棘紛無數。惟有皓質稱天女。高閣曾聞集上真。仙禽骨合來縣圖。又不見。道康堂上喚景怡。感卿盛德來相依。古來良禽多擇主。肯傍尋常庭戶飛。不信主人清比玉。請看雙燕玉爲衣。

顧仲方畫山水歌

良朋投合真有時。十載聞名不相知。偶爾相逢楊子宅。劇談浪謔忘還期。晚合猶勝不相遇。傾腸倒腹忘新故。只道長同薊北遊。何意便向江南去。君家別業冠江南。枕上青山滴翠嵐。密竹繁花迷鳥逕。交衡疊榭到魚潭。日高酒醒良賓集。翩翩手搦生花筆。險韻押傳詩客和。新腔填付歌兒習。錫泉酒美海螯肥。玉棧金盤列繡幃。顛狂肯問烏巾落。奮擲從教塵尾稀。朝朝暮暮停車馬。嬌歌急管催三雅。杯放香泉月並流。曲度南樓雲在下。人生朝露復何疑。君歸行樂正及時。醉月醉花從所好。聽絲聽肉詎言疲。自歌自吟還自壽。身前之名身後酒。才絕畫絕智亦絕。君家名士誰堪偶。江南樂事難具陳。管領金谷須高人。曹霸丹青何足貴。終日坎壈纏其身。

其二

吾觀仲方畫。不從諸家入。亦復不從十指出。直是一片豪性使氣結爲塊。以酒澆之不能止。忽爾迸散落縑素。偶然濃淡分山水。吾不知溪山之貌。仲方之貌。溪山無情有情含裏。那可辨。復有袁生失足混其間。數日苦熱。對公所作寒江流。百骸潑潑化潺湲。神魂清冷絕塵滓。恰逢投磔始驚還。却笑凡手拖擲胸中活。山水漫從死骨求筋髓。縱然逼真君家顧長康。抵掌虎頭徒爲爾。噫吁嘻。俗眼賞鑒皆如此。不重真骨重形似。

寒食有感

荒村鬼火燒枯樹。照見一片傷心處。古屋直西黑樹林。暗風淒雨愁殺人。堂上姑。堂下婦。短命兒。薄命母。新魂舊魂一處所。老鴟呼風夜啼虎。白日自寒天自黑。有子爲官亦何益。泉臺緩急不得力。兒生三十亦良艱。爾孫

相見能傳言。慎勿爲兒傷心肝。

詠懷效白

人各有一適。汝性何獨偏。愛閒亦愛官。諱譏亦諱錢。一心持兩端。一身期萬全。顧此而失彼。憂愁傷肺肝。人生朝露促。世福誰能兼。裴相豈不達。髮白方壯年。北窗高臥人。垂老缺朝餐。良無丘壑貴。安有火食仙。陵谷且難平。稊米寧不然。一毛附馬體。安問缺與完。角者奪其齒。飛者不能潛。鵬飛不笑鷺。鸞行不愛蛟。爾莫信爾意。兩粥擁衾眠。

壽亭舅贈我宜興瓶茶具酒具一時精美喜而作歌

吾舅贈我宜興瓶。色如羊肝堅如石。吾家復有古銅鐺。蓮子枯硬土花赤。茗品長興弟虎丘。釀法蘄州兄三白。酒苦茶香足我事。從此瓶鐺不虛設。虛堂寂寞門下櫬。無一枝送晨夕。讀書覺眉重。臨池嫌腕拙。世間百事百不能。乍可衡茆甘跼蹐。雲心齋前一片地。斑駁苔錢紅間碧。珊瑚漆几博山爐。拂竹捎花巧排列。左置鐺。右置瓶。大奴燒松根。小奴滌蠶罍。坐愁湯老手自淪。纔聞酒響涎不禁。三杯好顏色。七碗生寒粟。清冷頃覺肝腸換。磊塊都從毛孔出。劉伶頗酒不顧著。屈生愛醒不愛醒。醒醒中間安置我。日日挈鐺與挈瓶。况我此間蓬蒿宅。偏性畏人稀見客。此物湖海清狂流。能攻吾短獨吾癖。鐺也老友瓶小友。竹也此君丈也石。日與四子相周旋。其我山房呼五一。紛紛交態何須數。誰似爾我真莫逆。

書讀書樂後

龍湖老子手如鐵。信手許駁寫不輟。縱橫圓轉輕古人。遷也無筆儀無舌。一語能寒泉下膽。片言堪肉夜臺骨。我自別公苦寂寞。况聞病肺那忘却。忽有兩僧致公書。乃是手書讀書樂。自誇讀書老更強。膽氣精神不可當。歌管無情有真樂。問公垂老何飛揚。詩既奇崛字逾絕。石走巖皴格力蒼。老骨稜稜精炯炯。對此恍如坐公傍。龍

湖老子果希有。此詩此字應不朽。莫道世無賞音人。袁也寶之勝瓊玖。

詠懷

矯矯陶彭澤。飄飄賦歸田。六月北窗下。五柳衡門前。有巾將漉酒。有琴慵上絃。老死無儲粟。扣門語可憐。亦有白居易。分司饒俸錢。既卜洛中宅。常開花下筵。侍兒蠻素姣。賓客韋劉賢。楊枝歌子夜。霓裳舞春煙。伊余慕古人。冉冉迫中年。踟躕忽已久。未得一日歡。幸有祖父廬。兼之江郭田。雖缺聲伎奉。不乏腐儒餐。爲白非所望。爲陶諒難堪。揣分得所處。將處陶白間。

暮春鄒生邀黃思立諸公游高梁橋卽事

柳帶括晴空。晴鏡開清潭。長眉三十里。波底見行驂。雕弓簇小壁。茜衫逐冶男。西山如驛警。萬黛滴僧藍。長歌吹細縷。酒氣成煙嵐。鳥母出窺人。菱蒲綠盤髻。時聞惠連語。蒼翠似江南。

曹元和邀之靈慧寺同諸公賦

驃馬出塵海。入門聞午鐘。梢天樹輪囷。委地竹龍鍾。佛衣存古摺。僧老帶山容。經案列野蔌。禪板付歌童。西日射飛閣。霞裾凌虛空。萬井排蜂房。九陌喧蚊蟲。歸騎踏飛沙。耳後生長風。

送劉都諫謫遼陽

立志爲諍臣。萬死應不悔。含笑辭白髮。結束向遼海。遼海急兵戈。山高集犀鎧。久與狡倭持。戰氣何時解。萬里調客兵。餉絕兵饑餒。脫巾侮大將。易若捕蟲豸。未戰心先攜。兵驕將復狠。百無一堪用。可恃復安在。君行好折衝。旄節久相待。勉矣立功名。身爲國溝壘。

夏日高戶部循卿招飲大通橋同黃太常思立張國博叔聞項參知庭堅及舍弟中郎

一望皆林塘。孤亭臨水際。連轡四五人。一揖易巾屣。主人陳尊壘。花下趨人吏。兩行檀壓酒。百巡車行戢。長

艘潞河來。人衣沾草翠。潭影見軒窗。游魚呬亭宇。散坐捐煩惱。縱談忘忌避。水風醒心脾。百罰不成醉。舟行窮幽奧。目境轉奇邃。臨涯逼懸流。萬雷擊山墜。對面不聞語。但見口開閉。冰柱萬條直。雪巖千片碎。側身奔石間。趾酸心病悸。歸臥北窗下。枕邊聞水氣。

白蘇齋類集

卷之二

古詩類

新正三日雪窗早起

雪窗耀眼明。披衣起梳櫛。鏡光合雪光。光欲透膚革。面紋千百條。旁行相虬結。白鬚藏鬢中。似欲逃剪鐻。近服首烏丸。我首何曾黑。回念四句間。悲歡幾經歷。愁核埋胸臆。年深愁花發。綢紋乃蓓蕾。霜毛爲枝葉。譬彼治田人。種麥而得麥。仙藥豈能變。况餌木與石。白黑亦何殊。毋強生分別。且覓般若湯。一澆磊塊穴。

獨坐

天驅赤白丸。遞我東西奔。無履亦無足。來往何頻煩。坐令六合內。咄嗟換寒暄。投身冰火聚。誰能自騰羈。我生閱新春。已歷四十番。闌人朱紫叢。驚馬隨鵬鷗。寒熱穿骨髓。憂畏攻心魂。有似魚入網。又類雉居樊。今晨雪雲重。昏昏朝鍵門。結跏擁敗衲。真稱僵臥袁。逕滑呵導絕。密室誰晤言。凍雀撲紙窗。饑鼠窺殘樽。呼酒聊取適。苦樂未須論。

對酒

美酒入犀杯。微作松柏氣。佐之芹與蒿。頗有山林意。不用烹猪羊。酒清忌肥膩。頗有三日紅。囊無百錢費。不費復不饕。養財兼養胃。都門仕宦者。獨有二樂事。第一多美酒。第二饒朋輩。欲得不思歸。呼朋時一醉。

劉都諫左遷遼陽別數月矣遠致酒一甕爲之大醉數日

劉君別我久。遠餉酒一甕。甕大容五石。肩夫雙臂痛。清比惠井泉。白如雪山湏。因憶去年事。朝議同聚訟。都

諫上封章。語意帶譏諷。遂向遼陽幕。官微名轉重。沙磧驅凍驢。貰酒無餘俸。佳釀及故人。得微減朝甕。連晨開甕飲。昏花盡如夢。齋曝取殘經。揩眼逐字誦。斜日射階雪。熠熠金沙動。

夢花

夢中叢桂開。香露籠數畝。黃粒肥於豆。蒼枝大如肘。一笑開清樞。折柬邀詩友。忽悟客燕城。老桂何從有。以手急捫摸。驗是真花否。頗覺花非花。不悟手非手。一夢雜惺迷。真妄誰能剖。豈惟夜夢花。亦有晝生柳。此事實難知。試問逍遙叟。

報謁

杜門開七日。頽然忘身世。如入山裏山。散髮坐青鷁。夢中聞馬嘶。五內湯火沸。青袍冷于鐵。難着勝堅鎧。病馬負癩夫。衝泥穿闔閭。忙殺坐禪身。生憎六摺刺。

東坡作戒殺詩遺陳季常余和其韻

念爲生身核。業爲潤生汁。變化萬形骸。胎卵及化濕。共居佛土中。謀生各自得。楚痛誰能堪。相戕何太急。水珍炮鮭蟹。陸羞燔鵝鴨。俎豆萃賓朋。歌吹喧簾幕。以彼徹骨慘。博我雙頰赤。猶恨金盤內。肪膏少肥白。連箸風捲雲。剩脂汚巾幘。可憐橫死魂。繞釜啾啾泣。蔬果宜胃腸。此味真可缺。人羊遞往來。循環作主客。塞耳經所警。清虛道自集。

又

饑來喫白粥。渴來啜茗汁。六時經行裏。鉢盂兩度濕。清齋擁衲眠。清福誰消得。人命呼吸間。年光敲石急。因口造重罪。曾不異鷄鴨。萬錢充一餐。金玉燦紗幘。胸臆粟粟黃。虬脯珊瑚赤。剔骨積山高。棄脂塗地白。人亦大可怖。猛虎而冠幘。胎魂能入夢。變形訴且泣。食經并食典。妖傴胡可缺。錢獄受煮人是昔豪華客。五辛亦當屏。穢吻

餓鬼集。

又

三日不飲酒。無異蝸亡汁。一日不食肉。有似魚離濕。放箸脩已空。一飽竟何得。口腹我所緩。性命彼甚急。渾沌笑蜥蜴。闇弱欺鷄鴨。血色蝕刀砧。腥煙蒸帷幃。不思味報身。鐵網火洞赤。一念懺積魯。黑業立化白。譬如遇赦囚。鉗鎖換冠幘。戎刀殞虛空。魔王盡哭泣。世典不戒殺。竺書縫其缺。採毛可薦神。烹葵堪邀客。斷殺從此始。無令冤垢集。

附東坡戒殺詩

我哀籃中蛤。閉口護殘汁。又哀網中魚。開口吐微濕。剝腸彼交病。過分我何得。相逢未寒溫。相勸此最急。不見盧懷慎。蒸壺似蒸鴨。坐客皆忍笑。髡然發其羈。不見王武子。每食刀機亦。琉璃載蒸豚。中有人乳白。盧公信寒陋。衰髮得滿幘。武子雖豪華。未死神先泣。先生萬金璧。護此一蟻缺。一年如一夢。百歲真過客。君無廢此篇。嚴詩編杜集。

夜展張蠐集誤潑酒其上戲作

一生慣落第。結愁深貫骨。化作怪哉虫。蠶蠶亂卷帙。毒氣着人胸。好懷變蕭瑟。得酒應消糜。餘樽解吾戚。

元宵

獨倚寒簷看明月。月穿凍枝射衣。白火彈梢。大聲叱咤。猛省今夕是元夕。六衢今日人如蟻。到處筒花吐金蕊。三更煙滅游人歸。月洗天街淨如水。筒花開謝何匆亟。馬上看花人嘆息。不知花笑看花人。轉眼豪華也銷歇。白蘇居士大耐酸。菜羹粥碗坐團圓。木槩瓦缸光爛爛。不須更買彩燈看。

夏日黃平倩邀飲崇國寺葡萄林同江進之丘長儒方子公及兩弟分韻得閣字

數畝葡萄林。濃條青若若。垂藤如旖旎。布葉如帷幕。交蔓爲寶網。綴實成瓔珞。蜩蟬遞代響。清越鈞天樂。寒泉繞膝流。坐久怯衣薄。霞外四五朋。一笑破纏繖。依岸排繩床。科頭兼赤脚。語或禪或玄。雜之以詼謔。露葵帶雨烹。雲芽揀水淪。石砌滴琤琤。銅鑼鳴霍霍。毋陣分兩曹。奮爪如相搏。百罰嫌觥小。取鉢代杯杓。錦江氣豪宕。新都質文弱。其餘盡楚人。賦性俱脫略。鄉語雖醜醜。動塵珠錯落。三伏此中消。萬卷束高閣。

題馮中允貞壽冊

鬱鬱山上松。適與秋風會。貞甦冒霜青。亭亭直如蓋。黃口鳳凰雛。依條鳴嘖嘖。清響激層霄。錦羽如飛旆。一自所天亡。淑媛在顛沛。從逝豈不芳。立孤事爲大。睠此藐諸身。弓裘緊是賴。舍血傳遺書。文成起光怪。植身銅馬間。九域望滂沛。風膏明滅中。返危以爲泰。丈夫何必能。一聞一感慨。

又

日夕侍瑤山。徘徊銀榜側。我見大馮君。溫溫玉比德。清心符令顏。中懷淨若拭。巖象與風夢。之子終當協。竹孫有高標。鳳雛無短翼。母德夫如何。孤寧不修飭。如母所關係。不獨在一宅。育子爲名臣。功終歸社稷。六珈固已榮。亨途方始陟。

送峨帽僧清源時清源有檀香佛刻鏤甚精

師自峩峩來。往還經幾宿。茲山聞最高。幾許到天竺。師行遍天下。無乃是神足。竦身入梵宮。鏤此旃檀佛。金人捧劍篇（閨試）

長安佳麗逢上巳。秦主開筵面曲水。風送鶯聲雜管絃。柳拂晴煙澹羅綺。此時歌舞臨高臺。千鍾萬騎紛徘徊。輦轎睹金人騰曲水。手提三尺何雄哉。神物由來經百鍊。龜文龍藻相淩亂。寒光燁奕動流星。紫氣縱橫燦飛電。乍看出匣氣干雲。莫邪失色風胡驚。歛急青天風雨黯。慘淡日白虬龍噙。芙蓉爲鐔珊瑚把。神彩陸離照四野。令

君此際威中原。令君此際制西夏。于時秦王氣轉驕。戈鏃臨風風怒號。太原以東無王氣。函關萬里絕鳴鞘。英雄轉眄已沉淪。阿房只今艸青青。此劍毋乃歸延津。靈祕何年出水心。噫嘻吾將攜此清邊塵。

觀幸石景山臨觀渾河見水勢洶湧因念黃河時有衝決面諭輔臣經理須要得人復命作詩恭紀
(關試)

鸞輿回崦嶺。羽騎度巖河。仰睇石景山。俯瞰桑乾河。桑乾水流何太急。狂飈捲浪高千尺。浮澌穿石吼風雷。新漲奔崖亂雲日。聖主顧且驚。拊髀呼近臣。僅一衣帶水。泛濫愁吾人。况復河源來天上。湯湯百折經龍門。盤旋九曲銀潢轉。澎湃八紘滄海翻。頻年徐邳無安漢。白日蛟龍走林阜。縱有田閭豈足依。卽云疏築弗堪久。少府徒聞請萬縑。天吳時復愛千畝。金簡誰嗣敷土功。玄圭應待濟川手。微臣稽首頌吾皇。微予今復繼陶唐。欲笑秦王稱德水。還輕漢武築宣房。坐令蒿萊化禾黍。還教沮洳變康莊。載德老農歌擊壤。洪河萬里浮榮光。

白蘇齋類集卷之二終

白蘇齋類集 卷之三

今體

真定道中

馮高聊引睇。草色上征裾。垣斷暮山出。沙平江樹疎。清齋甘苜蓿。適意任蘧蒚。問我年來興。東溪足釣魚。

憩有斐亭

空亭堪徙倚。一水帶疎林。亂石含芳草。危橋度遠岑。野垣還竹色。淇澳尙泉音。豈不懷君子。高蹤何處尋。

歸興

家傍青山曲。門當綠水斜。長轡通吠澮。古木間桑麻。吾欲學爲稼。將無遂及瓜。還因歸里日。預已惜離家。

游百丈泉

青嶂崑崙赴郢東。寒泉飛處鬱嵒嵒。諸天晴灑千林雨。六月涼生萬壑風。小入傍崖驚浴鷺。斜穿曲澗掛飛虹。片時徙倚翻成惜。只合移家老此中。

偕館中兄弟游東郊卽事得東字

芳艸平原極望空。一尊紆殿與君同。千畦醉踏松杉影。萬馬驕嘶苜蓿風。白日悲歌從似俠。青春說劍更誰雄。聚星應識高陽侶。咫尺關門紫氣東。

題宋兵部竹軒

憐君卜築處。脩竹帶長鬚。月落千林靜。風生萬玉寒。韻清宜在耳。色秀悅堪餐。若遇徂徠侶。還將六逸看。

其二

微尚依高節。何能失此君。秋濤生白日。烟幹入高雲。清冷絃中意。宮商坐外聞。會心寧在遠。咫尺絕塵氛。

題宮樹春雲卷

絳闌連宵迥。重樓拂曙通。山嵐舊翠外。花氣郁紛中。鳴鳥驕芳樹。輕煙敞景風。何須臨曲巘。幽意足簾櫳。

送吳體中歸皖城體中與余有淨土之約故詩中及之

都門與子別。攜手復何時。匹馬從茲去。雙魚慰所思。微風動寶樹。朗月映花池。此地終同往。何當怨遠離。

閒雲館

遠徑天疑隔。憑虛境自玄。西山出樹杪。南浦落尊前。高枕羲黃上。逃名綺皓先。憑闌一以眺。雲起澹晴川。

挽周老師九首

赤鳥生前事。青編身後名。奠楹期已迫。曳履忽無聲。海宇摧隆棟。詞壇喪主盟。關情甯我輩。屑涕徧蒼生。

其二

供奉廿年久。傳經更草麻。生平公望鬱。垂老主恩加。國自憐三鑑。人誰續五車。燕山今夜月。荒艸咽清笳。

其三

靈氣東南歇。平原風雨昏。朱絃沉寶匣。白日黯重關。驚馬曾回眄。明珠豈報恩。山陽聞笛處。遙夜悵銷魂。

其四

天意今難問。悠悠可更論。青蠅堪自點。北斗望逾尊。暮雨淒蒿里。秋濤吼墓門。吾家湘水曲。涕淚續招魂。

其五

鰲鼈工射影。宇宙亦離才。斗氣三江散。風悲萬壑哀。寧能甘蠖屈。那肯受鷗猜。煜煜餘方寸。報恩心未灰。

其六

藏舟還此日。鳴珮憶前辰。神理知難盡。音容悅可親。青旻看馭鶴。夜雨泣亡麟。我輩徒酸鼻。誰堪贖此身。

其七

萬里南歸路。柔條一夕衰。陰風生宰樹。燐火照孤帷。不盡羊曇淚。無窮宋玉悲。所嗟梁木壞。何止哭吾私。

其八

天賜滕公室。朝分少府錢。束芻俱上客。漬酒盡時賢。衰字千秋重。溫綸片碣懸。階庭雙玉樹。霄漢應蟬聯。

其九

篋有進賢草。家無封禪篇。琴書渺長物。歲月足丹鉛。不朽中郎筆。新題有道阡。如公堪目瞑。何必羨長年。

送楊太史使淮便道省母

淮王邸第舊稱雄。玉節東來太史公。路入吳疆家尚遠。客遊梁苑賦還工。雲開層嶺梅花碧。雨過千林荔子紅。此日張筵宜壽酒。綵衣象服映簾櫳。

送周太史使魯便道壽伯母

玉節藏蕤出禁城。依依垂柳送君行。重裁東魯靈光賦。誰似西京子墨卿。採燭昔年傳蠟鳳。稱觴此日借金尊。謝家况復多才子。青艸池塘舊有名。

立春惟長舅無學弟暨王吳兩生同游野寺看梅三首

古寺逢人少。尋香一徑斜。低枝半隱樹。深谷易爲花。坐久歌頻換。尊空酒更賒。最憐僧愛客。隨意供新茶。

其二

僧隱紫關裏。杯行竹徑中。艸心尙隱綠。花蕊未舒紅。近水天難夜。高原晚易風。班荆聊共醉。車馬莫匆匆。

其三

莫惜傾三雅。春來第一游。舅甥多雅詭。文酒是名流。客有王摩詰。人逢顧虎頭。東山初吐月。酣極轉清幽。

是日登寺樓。甚幽諸公擬借爲社。遂各施買酒餘錢。付僧葺窗檻并志。

無處堪逃俗。高樓遠市塵。香雲消永日。法雨近諸天。欲借繙經地。先分貰酒錢。沉酣那可極。長此與安禪。

立春後六日爲分歲會。後八日爲除夕。

柏葉開新會。辛盤取次陳。今年春事早。杯酒日相親。冉冉如流歲。蕭蕭見在身。忍虛分歲約。同是失年人。

其二

除夕他時節。椒觴此日開。三彭元不問。二仲喜能來。人惜年光逝。詩逢暮雨催。家園當勝日。幽興轉難裁。

早春猶坐

朝來獨倚欄。尊酒若爲歡。春換江頭綠。年催鏡裏丹。迂疎生事簡。嬾慢見人難。何計消閒晝。蒼筤好自看。

幽棲

高枕非逃世。幽棲自寡營。宦情方朔澹。家累向平輕。歲月憂何事。漁樵共此生。空亭對酒處。白雪滿江城。

其二

豈是雲霄客。居然江海人。逕惟羊仲過。壁以馬卿貧。俯仰終何意。疎慵好乞身。已拚閑歲月。甘老故鄉尊。

攜尊江上

郭外同君去。清尊對水涯。寒潮鳴草徑。積雪耀平沙。小艇乘流急。人家逐岸斜。流連歸路晚。高柳亂啼鴉。

其二

一到江湖上。浮生事事輕。寒煙迷古渡。白浪抱荒城。兩岸花爭發。中流鳥不驚。扁舟如可問。一任五湖行。

王憲皋督學滇中歸阻風雪於公安留觴二首

此日成僵臥。何期見子猶。牂牁萬里到。驪馬一尊留。小邑饒村饜。長江若石尤。無嗟鄉路遠。五日到黃州。

其二

最愛新年雪。能留竟日觴。文章化越嶲。車馬度瀟湘。覽勝稱雞足。交游感雁行。更憐萊子意。把酒獨思鄉。

南平社六人各一首

外大父方伯公

風神只似壯齡時。鶴髮丹顏古接離。此日南平白社長。當中中土紫薇司。燈前歷歷蠅頭字。篋裏翩翩近體詩。江月江花時共賞。非仙非隱使人疑。

孝廉舅惟學

少年經術兼詞學。中歲空門又道家。服藥前身應許遜。博聞宿世定張華。懷中明月珠堪售。望裏神仙路不賒。只恐鳳池須綵筆。難從勾漏問丹砂。

侍御舅惟長

懶慢人間惟叔夜。閒居膝下似安仁。雲霄閣外沉冥客。花月尊前感慨身。圃學東陵瓜欲結。家通北渚蕙堪紉。長卿此日遊將倦。醉月吟風幸托鄰。

中郎弟進士

前年羽獵獻長揚。歸去三湘問雁行。作賦麗如袁彥伯。通經精似蔡中郎。角巾領袖高陽侶。麈尾憑陵俠少場。夢草眞堪對小謝。種花無那去河陽。

小脩弟文學